

26 DI SETEMBAR: LA FIESTE DES LENGHIS IN DUTE EUROPE

“U nîts inte diversitât” nol è dome il sproc de Union europeane, ma ancje la fuarce dal nestri continent. Si stime che inte Union Europeane si fevelin passe 80 lenghis diferentis; di chestis, lis lenghis uficiâls a son 24 e chês minorizadis passe 60, feveladis di 50 milions di personis che a fasin part di une minorance nazionâl o di une comunitât di lenghe minoritarie. Lis trê lenghis di minorance de nestre region a jentrin in chest grup. Une diversitât linguistiche e culturâl di prudelâ e valorizâ, tant che element di fonde de societât multiethniche contemporanie.



Il Consei de Europe al promôf il pluralisim propit parcè lu calcole un strument che al jude la comprension interculturâl, e un element clâf dal nestri patrimoni culturâl. Al è juste apont su sô iniziative che ai 26 di Setembar di ogni an si festeze la Zornade Europeane des Lenghis.

La prime Zornade Europeane des Lenghis e je stade organizade insiem dal Consei de Europe e de Union europeane tal 2001, e e à cjapât drenti milions di personis cun ativitâts par celebrâ la diversitât linguistiche e par promovi l'aprendiment des lenghis. Viodût il sucès vût de iniziative, il Consei al à decidût di celebrâle ogni an.

I obietîfs gjenerâi de Zornade a son di informâ il public su la impuartance di imparâ plui lenghis, cul fin di inçessi il plurilinguism e la comprension culturâl; di promovi, tutelâ e favorî la diversitât linguistiche e, par finî, di incoragjâ a imparâ lis lenghis dilunc di dute la vite, a cualsisedi etât e par cualsisedi reson. Imparâ lis lenghis di altris popolazions nus jude a capî miôr la lôr culture e a superâ lis diferencis. Il Consei de Europe si augure che cheste zornade e vegni festezade a diviers nivei, no dome dai citadins e dal mont de scuele, ma ancje dai responsabii politics.

Lis competencis linguistiche no son dome une necessitât comune, intun mont globalizât e intune economie cussì in moviment, ma ancje un drit di ducj. Chest al è un dai messaçs principâi de Zornade Europeane des Lenghis.

Par vê plui informazions su la Zornade, su dutis lis iniziativa organizadis in Europe e par discjamâ materiâi didatics e informatîfs, si pues lâ sul sît dal Consei de Europe a cheste direzion: www.coe.int/edl.

La Agenzie Regjonâl pe Lenghe Furlane e promôf ogni an chest event, organizant spazis informatîfs par distribuî materiâi e gadget. L'apontament al è par miercus ai 26 Udin in vie Lionello des 10 di matine aes 6 sot sere. Cun di plui la ARLeF e sarâ presinte sabide ai 29 e domenie ai 30 di Setembar a Gurize, drenti di Gusti di Frontiera.

Pagjine par cure de ARLeF -
Agenzie Regjonâl pe Lenghe Furlane

ARLeF
AGENZIE
REGJONÂL
PE LENGHE
FURLANE